

Biblioteke između stvarnog i mogućeg

Libraries between Reality and Possibility

OVČINA, Ismet. *BIBLIOTEKE između stvarnog i mogućeg : članci, studije, intervjui = Libraries between Reality and Possibility : Articles, Studies and Interviews* / [prevodioci, translators Dragana Bogdanović, Adisa Krilić]. Sarajevo : Nacionalna i univerzitetska biblioteka Bosne i Hercegovine = National and University Library of Bosnia and Herzegovina, 2008. 168 str. (Edicija Stručna biblioteka literatura = Series Professional Library Literature)

Prof. dr. Emina Memija, Filozofski fakultet Univerziteta u Sarajevu Odsjek za komparativnu književnost i bibliotekarstvo / Faculty of Philosophy University of Sarajevo Department for Comparative Literature and Library Science Sarajevo, BiH

Knjiga što je pred nama, autora dr Ismeta Ovčine: Biblioteke između stvarnog i mogućeg, strukturirana u šest tematskih cjelina, zapravo je omaž bibliotečkoj disciplini staroj koliko i ljudsko pamćenje. Naslov nam sugerira da je između onoga što jeste i onoga što se želi popriličan raskorak, ali on se svakako smanjuje zahvaljujući, prije svega, ljubavi prema knjizi i svijesti o njenoj moći. A upravo ta spoznaja o snazi pisane riječi bila je uzrokom pogroma učinjenog nad njom. Naime, ako izuzmemo ljudske žrtve, najveći gubitak koji je Bosna i Hercegovina doživjela u periodu 1992-1995. godina jeste paljevina

Nacionalne i univerzitetske biblioteke Bosne i Hercegovine (NUBBiH) i Orijentalnog instituta iz Sarajeva. Na zgarištu krovnih biblioteka naše zemlje - NUBBiH - sačuvano je tek deset odsto knjižnog blaga, a u biblioteci Orijentalnog instituta vatra nije ostavila niti jedan list. Ali veliko postignuće je što su obje ustanove, kao feniks iz pepela, zahvaljujući najprije vlastitom kadru i menadžmentu, na putu da dostignu nekadašnje bogatstvo, iako je nešto knjiga i dokumenata nenadoknadivo.

Pored gubitka fonda, NUBBiH je ostala i bez svoga prostora i sada djeluje u privremenom i neuslovnom objektu, ali ne samo da djeluje, nego i razvija višestruke aktivnosti - od popunjavanja fonda i saradnje sa srodnim ustanovama u svijetu, do uključivanja u najnovija dostignuća u sferi informacionog sistema, kome i sama pripada kao neraskidiva karika u globalnom lancu.

Inače, gotovo da nema biblioteke u Bosni i Hercegovini koja nije oštećena, osiromašena ili uništena. Stoga sve što se radi na revitalizaciji bibliotekarstva znači istovremeno i rad na prosperitetu države. Jer, informacija je danas možda najvrijedniji resurs, a biblioteka njeno sabiralište i uslužni faktor.

U malom procentu sačuvanih djela NUBBiH nasreću našlo se i nešto raritetnih i unikatnih primjeraka iz naše baštine. Stoga nije čudno da autor ove knjige jedno poglavlje posvećuje ovoj

temi i obavještava nas o širokoj aktivnosti u obnovi slavističke zbirke, koja je nažalost uništena. Ono što posebno raduje jeste da je ovoj ustanovi donirana laboratorija za konzervaciju i restauraciju.

Knjiga dr. Ismeta Ovčine pruža svome čitaocu bogatu informaciju o ulozi Nacionalne i univerzitetske biblioteke BiH u visokoškolskom obrazovanju, u nauci, u podizanju općeg nivoa biblioteka u zemlji, digitalizaciji, širenju informacione mreže, i dr. Pored namjenski pisanih tekstova, tu su i neki intervjui autora kao osobe na čelu Biblioteke, koji također sadrže korisne podatke.

Sve što doprinosi poboljšanju stanja u bibliotekarstvu je dobrodošlo, pa i tekstovi ove knjige koji utiru puteve do novoga, bogatijega što, nadajmo se, uz nastavak dosadašnjeg angažmana, slijedi u narednom periodu. I zato preporučujem ovu knjigu.

